

四庫全書

子部

欽定四庫全書

子部

御定淵鑑類函卷一百三十九

詳校官閣學士臣尹壯圖

主事臣祁韻士覆勘

總校官檢討臣何思鈞

校對官中書臣馮培

謄錄監生臣朱上林

欽定四庫全書

御定淵鑑類函卷一百三十七

政術部十六

選舉

選舉一

增王海曰王者各有所貴堯舜貴道德夏貴功商貴老
周貴同姓秦貴法吏西漢貴才謀東漢貴經術魏貴文
章晉貴名理周隋貴氏族觀其所貴知治體之優劣然
最無謂者其氏族乎文獻通考曰古之用人德行為

首才能次之虞朝載采亦有九德周室賓興考其德行
於才不屑屑也兩漢以來刺史守相得以專辟召之權
魏晉而後九品中正得以司人物之柄皆考之以里閭
之毀譽而試之以曹掾之職業然後俾之入備王官以
階清顯蓋其為法雖有愧於古人德行之舉而猶可以
得才能之士也至於隋而州郡僚屬皆命於銓曹搢紳
發軔悉由於科目自以銓曹署官而所按者資格而已
於是勘籍小吏得以司升沈之權自以科目取士而所

試者詞章而已于是操觚末技得以階榮進之路選賢
與能之意無復存矣然此二法者歷數百年而不可以
復更 孔帖曰裴子野曰周禮始於學校論之州里告
之六事而後貢於王庭其在漢家州郡積有功能然後
為五府所辟五府舉其掾屬而升於朝三公參其得失
尚書奏之天子一人之身所閱者衆一賢之進其課也
詳故官得其才魏晉易是所失弘多萬品千羣俄折於
一面庶僚百位專斷於有司 宋書曰周漢之道以智

役愚魏晉以來以貴役賤 文獻通考曰按西都舉人
之法以孝廉及賢良方正有未仕而舉者有既仕而舉
者蓋未仕者以此開選舉之門而既仕者以此定考課
之法也又按西漢舉賢良文學則令其對策而孝廉則
無對策之事蓋所謂賢良文學者取其忠言嘉謨足以
佐國崇論弘議足以康時若孝廉則取其履行而非資
其議論也

選舉二

原周官大司徒職以鄉三物教萬民而賓興之

一曰六德二曰

六行三詩書禮樂謂之四術四術既修九年大成凡士

之有善鄉先論士之秀者升諸司徒曰選士司徒論選

士之秀者而升諸學曰俊士既升而不征者曰造士大

樂正論造士之秀者升諸司馬曰進士司馬論進士之

賢者及鄉老羣吏獻賢能之書於王王再拜受之登於

天府藏於祖廟內史書其貳而行焉

書其貳謂寫其副本

周之選

舉鄉大夫鄉老舉賢能而賓其禮司徒教三物而興諸

學司馬辨官材以定其論太宰詔廢置而持其柄內史
贊與奪而貳於中司士掌其版而知其數論定然後官
之任官然後爵之位定然後祿之擇材取士如此之詳
也秦自孝公納商鞅策富國強兵為務仕進之途唯
闢田與勝敵而已漢高祖初未遑立制至十一年乃
下詔曰賢士大夫既與我定有天下而不與我共安利
之可乎有肯從我遊者吾能尊顯之以布告天下其有
稱明德者郡守必身勸勉遣詣丞相府署其行義及年

有其人而不言者免官又制諸侯王得自除內史以下
漢獨為置丞相也惠帝四年詔舉人孝悌力田者復其
身高后元年初置孝悌官二千石者一人文帝因晁

錯言務農貴粟詔許人納粟得拜爵及贖罪景帝後

元二年詔曰其惟廉士寡欲易足今貲算十以上乃得
官廉士算不必衆有市籍不得官無訾又不得官朕甚

憐之訾算四得官亡令廉士久失職

有市籍謂賈人有財不得為吏貲萬

錢算百二十也算十萬時疾吏之貪以為衣食足知榮
辱故限貲十萬乃得為吏廉士無貲減至四算乃得官

也

武帝建元初始詔天下舉賢良方正直言極諫之士其理申商韓非蘇秦張儀之言亂國政皆罷之元光元年舉賢良董仲舒對曰夫長吏多出於郎中中郎吏二千石子弟選郎吏又以富貴未必賢也且古所謂功者以任官稱職為差非謂積日累久也故小材雖累日不離於小官賢材雖未久不害為輔佐是以有司竭力盡智務治其業而以赴功今則不然累日以取貴積久以致官是以廉恥貿亂賢不肖混殽也請令諸列侯郡

守二千石各擇其吏民之賢者歲貢各二人以給宿衛
且以觀大臣之能所貢賢者有賞不肖者有罰夫如是
諸侯吏二千石皆盡心於求賢天下之士可得而官使
也帝於是令郡國舉孝廉各一人

孝謂善事父母
廉謂清潔廉隅

又制

郡國口二十萬以上歲察一人四十萬以上二人六十
萬三人八十萬四人百萬五人百二十萬六人不滿二
十萬二歲一人不滿十萬三歲一人限以四科一曰德
行高潔志節清白二曰學通行修經中博士三曰明習

法令足以決疑能按章覆問文中御史四曰剛毅多略

遭事不惑明足決斷材任三輔縣令至五年又詔徵吏

人令與計偕

計者上計簿使也郡國每歲遣詣京師上之偕者俱也令所徵之人與計者俱來

元朔元年又詔曰興廉舉孝庶幾成風夫十室之邑必

有忠信三人同行厥有我師今或至闔郡而不薦一人

是化不下究而積行之君子壅於上聞也且進賢受上

賞蔽賢蒙顯戮古之道也其與中二千石禮官博士議

不舉者罪是時天下慎法莫敢謬舉而貢士蓋鮮故有

斯詔有司議曰古者諸侯不貢士一則黜爵再則削地
三則黜爵削地畢矣夫附下罔上者死附上罔下者刑
與聞國政而無益於人者斥在上位而不能進賢者退
其不舉孝不奉詔當以不敬論

為其不求
士報國也

不察廉為不

勝任也當免奏可凡郡國之官非傳相其他既自署置
又調屬僚及部人之賢者舉為秀才廉吏而貢於王庭
多拜為郎居三署無常貢或至千人屬光祿勳故卿校
牧守居閒待詔或郡國貢送公車徵起悉在焉光祿勳

復於三署中銓第郎吏歲舉秀才廉吏出為他官以補

缺負

後漢制同

元封五年又詔曰蓋有非常之功必待非常

之人故馬或奔蹏而致千里

蹏蹏也奔走也奔蹏者乘之即奔立則蹏人蹏徒計

反士或有負俗之累而立功名夫泛駕之馬

泛覆也音方勇反覆

駕者言馬有逸氣而不循軌轍也

跖弛之士

跖者跖落無檢局也弛者放廢不遵禮度也跖音吐

各亦在御之而已其令州郡察吏人有茂材異等者初

公孫弘以儒術為丞相天下之學靡然嚮風時外事四

夷內闕用度仍募人入羊穀奴婢得授官增秩復役除

罪大至封侯卿大夫小者郎吏繇是吏道雜而多端官

職耗廢矣

孝昭始元初遣故廷尉王平等五人

前為此官

今不居官皆謂之故

持節行郡國舉賢良

孝宣帝時諫議大夫

王吉上言曰今使吏得任子弟

子弟以父兄任為郎也

率多驕驚

驚與傲同

不通古今至于積功理人無益於人此伐檀所為

作也

伐檀詩篇名刺不用賢也

宜明選求賢除任子弟之令黃龍初

制凡官秩六百石者不得舉為廉吏元帝永光元年

二月詔丞相御史舉質樸敦厚遜讓有行者光祿歲以

此科第郎從官

始令丞相御史舉此四科人以擢用之而見在郎及從官又令光祿每歲依此

科考校定其第高下知其人賢否也

又詔列侯舉茂材諫議大夫張勃舉

大官獻丞陳湯

獻丞主貢獻物

湯有罪勃坐削戶二百會薨故

賜謚曰繆侯

以其所舉不得人故如惡謚繆者妄也

其為勸勵也如是故

官得其材位必久安為吏者長子孫居官者以為姓號

三代以降斯之為盛

詳考績

成帝建始四年初置常侍

曹尚書一人主公卿又有二千石曹尚書一人掌郡國

二千石蓋選曹之所起也漢諸帝凡日蝕地震山崩川

竭天地大變皆詔天下郡國舉賢良方正極言直諫之士率以為常又其有要任使皆標其目而令舉之後漢光武十二年詔三公舉茂材各一人廉吏各一人左右將軍歲察廉吏各二人光祿歲舉郎茂材四行各一人察廉吏三人中二千石歲察廉吏各一人廷尉大司農二人將兵將軍歲察廉吏各二人監御史司隸州牧歲舉茂材各一人改前漢常侍曹尚書為吏部尚書其時選舉於郡國屬功曹於公府屬東西曹於天臺屬吏

曹尚書亦曰選部而尚書令總之其所進用加以歲月先後之次凡郡國守相視事未滿歲不得察舉孝廉吏

以其未久不周知也所徵舉率皆特拜不復簡試士或矯飾謗議漸生章帝建初元年詔曰夫鄉舉里選必累

功勞今刺史守相不明真偽茂材孝廉歲以百數

漢曰秀才

後漢避光武諱故曰茂材魏曰秀才

既非能顯而當授之政事甚無謂也

每尋前世舉人貢士或起畎畝不繫閭閻敷奏以言則文章可採明試以功則政有異迹文質彬彬朕甚嘉之

始復用前漢丞相故事以四科辟士

武帝因董仲舒之言立制故事在丞

相府今復用之第一科補西曹南閭祭酒二科補議曹三科補四辟入奏四科補則決

凡所舉士

先試之以職乃得充選其德行尤異不宜試職者疏於

他狀舉非人兼不舉者罪 安帝永初二年詔王官屬

黑綬下至郎謁者經任博士居鄉里有廉清孝順之稱

才任理人者國相歲移名與計偕上尚書公府通調令

得外補順帝又增甲乙科貢十人除郡國耆儒皆補郎

舍人陽嘉元年尚書令左雄改察舉之制限年四十以

上儒者試經學文吏試章奏如有顏回子奇之類不拘
年齒尚書僕射胡廣尚書郭虔等駁之曰選舉因才無
拘定制六奇之策不出經學鄭阿之政非必奏章甘奇
顯用年乖強仕終賈揚聲亦在弱冠漢承周秦兼鑒殷
夏祖德師經參雜霸軌聖主賢臣代以致理貢舉之制
莫或迴革今以一臣之言不可剋戾舊章竟從雄議於
是雄上言郡國孝廉古之貢士出則宰人宣協風教若
其面牆則無所施用孔子曰四十而不惑禮稱強仕請

自今孝廉年不滿四十不得察舉皆請先詣公府諸生

試家法

儒有一家之學故曰家法

文吏課牋奏覆之端門練其虛實

以觀異能以美風俗有不承科令者正其罪法若有茂才異行自可不拘年齒帝從之明年有廣陵孝廉徐淑年未及舉疑而詰之對曰詔書有如顏回子奇不拘年齒雄詰之昔顏回聞一知十孝廉聞一知幾淑無以對乃遣還郡於是濟陰太守胡廣等十餘人皆坐謬舉免黜唯汝南陳蕃潁川李膺下邳陳球等三十餘人得拜

郎中自是牧守畏慄莫敢輕舉雄在尚書迄於永嘉十
餘年間察選清平多得其人雄又奏徵海內名儒為博
士使公卿子弟為諸生有志操者加其俸祿及汝南謝
廉河南趙建年始十二各能通經雄並奏拜童子郎自
是負書來學雲集京師後黃瓊為尚書令以雄前所上
孝廉之選專用儒學文吏乃奏增孝弟及能從政者立
為四科 桓帝建和初詔諸學生年十六以上比郡國
明經試次第上名高第十五人上第十六人為郎中中

第十七人為太子舍人下第十七人為王家郎永壽二年甲午詔復課試諸生補郎舍人其後復置學生滿二歲試通二經者補文學掌故其不通二經者須後試復隨輩試通二經者亦得為文學掌故其已為文學掌故者滿二歲能通三經者擢其高第為太子舍人其不得第者後試復隨輩試第復高者亦得為太子舍人已為太子舍人滿二歲試能通四經者推其高第為郎中其不得第者後試復隨輩試第復高者亦得為郎中已為

郎中滿二歲試能通五經者推其高第補吏隨才而用

其不得第者後試復隨輩試第復高亦得補吏其後綱

紀隳紊凡所選用莫非情故時議以州郡相阿人情比

周乃制婚姻之家及兩州之人不得相臨遂復有三互

法三互謂婚姻之家及兩州不得交互為官是時史弼遷山陽太守其妻鉅野薛氏女以三互自上轉拜平

原相是也禁網益密選用彌艱幽冀二州久闕而公府限以

三互經時不補議郎蔡邕上言曰伏見幽冀舊壤鎡馬

所出比年兵饑漸至空耗闕職經時吏人延屬而三府

選舉逾月不定以避三互十二州有禁當取二州之士
又二州之士或復限以歲月狐疑淹遲以失事會愚以
為三互之禁禁之薄者但申以威靈明其憲令在任之
人豈不戒懼而坐設三互自生留闕邪昔韓安國起自
徒中買臣出於幽賤並以才宜還守本邦豈復顧循三
互繼以末制者乎臣願蠲除近禁其諸州刺史器用可
授者無拘日月三互以差厥中靈帝不省是時諸博士
試甲乙科爭第高下更相告訟頗行賄賂改蘭臺漆書

之經以合其私文者帝乃詔諸儒讐定五經而鐫石以刊其文使蔡邕等書為古文篆隸三體立于太學門謂之石經自是爭者乃息凡學士不得有金瘡痼疾督書

其版舉主保之

其督郵版狀曰生事愛敬喪沒如禮易尚書孝經論語兼綜載籍窮微闡奧師

事某官見授門徒五十人以上隱居樂道不求聞達身無金瘡痼疾三十六屬不與妖惡交通王侯賞賜行應四科經任博士下者某官某甲保舉魏文帝為魏王時三方鼎立士流

播遷四人錯雜詳覈無所延康元年吏部尚書陳羣以天朝選用不盡人材乃立九品官人之法州郡皆置中

正以定其選擇州郡之賢有識鑒者為之區別人物第其高下又制郡口十萬以上歲察一人其有秀異不拘戶口其武官之選俾護軍主之黃初三年始除舊漢限年之制令郡國貢舉勿拘老幼儒通經術吏達文法則皆試用自明帝太和之後俗有浮靡遞相標目而夏侯諸葛何鄧之儔有四聰八達之稱或禁錮廢黜以懲之吏部尚書盧毓奏曰古者敷奏以言明試以功今考績之法久廢而毀稱相進退故真偽混雜也帝遂詔散騎

常侍劉邵作都官考課之法以考覈百官

具考績篇

晉依

魏氏九品之制內官吏部尚書司徒左長史外官州有

大中正郡國有小中正皆掌選舉若吏部選用必下中

正徵其人居及父祖官名武帝泰始初又議考課

詳考績

散騎常侍傅玄皇甫陶以為政教頽弊風俗不淳上疏

帝乃使玄草詔進之武帝甚善而終不能用于時雖風

教頽失而無典制然時有清議尚能勸俗陳壽居喪使

女奴丸藥積年沈廢邵詵篤孝以假葬違常降品一等

其為懲勸也如是其後中正任久愛憎由已而九品之

法漸弊遂計官資以定品格天下惟以居位者為貴尚

書僕射劉毅以九品者始因魏初喪亂是軍中權時之

制非經久之典也因用土斷復古鄉舉里選之法上疏

曰夫九品有八損而官才有三難

云

職名中正實為

奸府事名九品而有八損臣以為宜罷中正除九品棄

魏氏之弊法立一代之美制司空衛瓘又表請除九品

復古鄉議里選及劉頌為吏部尚書復建九班之制令

百官在職少遷時賈郭專朝仕者務速進故皆不行孫氏

有江東選曹尚書主選舉吳郡暨艷性峭刻好清議為尚書以郎署混淆多非其人艷欲激濁揚清別其善否乃覈選三署皆貶高就下降損數等其居位貪婪志節卑汚者皆以為軍校置之營府于是怨聲囂然競言用私情坐自殺東晉元帝制揚州歲貢二人諸州各一人時

以天下喪亂務存慰勉遠方孝秀不復策試到即除署既經略初定乃詔試經有才不中舉者免其太守其後孝秀莫敢應命有送至京師皆以疾辭太興三年尚書孔坦議請普延五歲許其講習乃詔孝廉申至七年而

秀才如故 宋制丹陽吳會會稽吳興四郡歲舉二人
餘郡各一人凡州秀才郡孝廉至皆策試天子或親臨
之及公卿所舉皆屬於吏部銓用凡舉得失各有賞罰
失者其人加禁錮年月多少隨部議制文帝元嘉中限
年三十而仕郡縣以六周而代刺史或十餘年及孝武
即位仕者不復拘老幼守宰以三周為滿帝不欲重權
在下乃令吏部置兩尚書以散其權 齊尚書都令史
駱宰議策秀才格五問並得為上四三為中二為下一

不合與第謝超宗議以為片辭折獄寸言挫衆魯史褒
貶孔論興言皆無俟繁而後秉裁夫表事之深析理之
會豈必委牘方切理道非患對不盡問患以常文弗奇
必使一通峻正寧劣五通而常與其俱奇一亦宜採詔
從宰議因習宋代限年之制然而鄉舉里選不覈才德
其所進取以官婚胄籍為先遂令甲族以二十登仕後
門以三十試吏故有增年矯貌以圖進者其時士人皆
厚結姻援奔馳造請浸以成俗 梁初無中正制年二

十有五方得入仕天監中又制凡九流常選年未三十不通一經者不得為官若有才同甘顏勿限年次至七年州置州重郡置郡崇鄉置鄉豪各一人專典搜薦無復膏粱寒素之隔普通七年詔凡州歲舉二人大郡一人敬帝太平二年復令諸州各置中正仍舊訪選舉皆須中正押上然後量授不然則否 陳依梁制凡年未三十不得入仕惟經學生策士得第諸州迎主簿西曹左奏及嘗為挽郎得未壯而仕諸郡唯正王為丹陽尹

經迎得出身者亦然庶姓尹則否有高才異行殊勲別
降恩旨敘用不在常例凡選無定時隨缺則補官有清
濁以為升降從濁得清則勝於選若有遷授吏部先為
白牒列數十人名尚書與參掌者共署奏敕或可或否
其可者則下於選曹量貴賤別內外隨才補用以黃紙
錄名八座通署奏可乃出以付於典名典名書其名帖
鶴頭版修容整儀送所授之家其別發詔除者即宣付
詔局詔局草奏聞敕可黃紙寫出門下門下荅詔請付

外施行又書可付選司行名得官者不必皆行名到但聞詔出明日即入謝後詣尚書上省拜受凡拜官皆在午後初武帝承侯景喪亂之後綱維頽壞制度未立而百官無復考校殿最之法但更年互遷驟班進秩法無可稱者後徐陵孔奭繼為吏部尚書差有其序後魏州郡皆有中正掌選舉每以季月與吏部銓擇可否其秀才對策第居中上表敘之文成帝和平三年詔今選舉之官多不以次令班白處後晚進居先豈所謂彝倫

攸敘也諸曹選補宜各書勞舊才能

初崔浩為冀州大中正薦冀定相幽

并五州士數十人各起家為郡守景穆帝謂浩曰先召
之人亦州郡選也在職已久勤勞未荅令先補前召外
任州郡以新召者代為郎吏又守宰人宜使更事者浩
固爭而遣之高允聞之謂東宮博士管恬曰崔公其亦
不免乎苟逞其非而校勝於上何以能濟又李孝伯
趙郡人名曾治鄭氏禮左氏春秋郡三辟功曹不就門
人勸之曾曰功曹之職雖曰鄉選高第猶足郡吏耳北
面事人亦何容易任郡主簿到官月餘曾乃歎曰梁叔
敬有云州郡之職徒勞人耳道之不行身之憂也遂還
家又郭祚為吏部尚書時潔清重惜官位至於銓授
假令得人必徘徊久之然後下筆即云此人便已貴矣
由是事頗為稽遲當時每招怨讟然所拔用者量材稱
職時又以
此歸之

其後中正所銓但在門第吏部彞倫仍多不

才孝文帝勵精求治內官通班以上皆自考覈以為黜

陟

具考績篇

宣武帝詔庶族子弟年十五不聽入仕

任城王澄從幸

鄴宮除吏部尚書及幸代車駕自北巡留澄銓簡舊臣
初魏自公侯以下迄于選臣動有萬數冗散無事澄品
為三等量其優劣盡其能否之用咸無怨者又韋太
伯昕兄子場為吏部郎性貪婪鬻賣吏官皆有定價

和以前精選中正德高鄉國者充其邊州小郡人物單

鮮者則併附他州其在選陋者則闕而不置當時稱為

簡當頗為得人及宣武孝明之時州無大小必置中正

既不可悉得其人故或有蕃落庸鄙操銓覈之權而選

敘顏素至正始元年冬乃罷諸郡中正時有以雜類冒

登清流遂令在位者皆五人相保無人保任者奪官還

役初孝明嗣位幼沖靈太后臨朝征西將軍冀州大中

正張彛之子仲瑀上封事請銓別選格排抑武夫不使

在清品於是武夫怨怒聲喧道路乃懸榜於衢會期屠

害彛父子不以為懷神龜二年羽林虎賁相率千餘人

至尚書省詬詈求彛長子尚書郎始均不獲以瓦礫投

數臺閣聲如雷霆京師懾震莫敢討遏遂聚火就焚其

第拽彛於庭捶辱恣心而呼聲動京邑其子叩頭流血
為父請命羽林乃執始均生投火中灼為煨燼仲瑀被
創以竄免彛一宿而死既而詔斬其尤兇者八人餘大
赦以安之天下冤痛聞者驚駭靈太后乃命武官得依
資入選既而官員少而應調者多選曹無以處之及崔
亮為吏部尚書乃奏為格制官不問愚賢以停解日月
為斷雖復官須此人停日後者終不得取庸才下品年
月久者則先擢用時沈滯者皆稱其能後甄琛元修義

城陽王徽相繼為吏部尚書利其便已踵而行之自是
賢愚同貫涇渭無別魏之失才從亮始也孝莊帝詔求
德行文藝政事強直者縣令郡守刺史皆敘其志業具
以表聞三人以上縣令太守刺史賞一階舉非其人者
黜一階凡官郡守縣令六年為滿滿後六年乃敘任
北齊選舉多沿後魏之制凡州縣皆置中正其課試之
法中書策秀才集書策貢士考功郎中策廉良天子常
服乘輿出坐於朝堂中楹秀孝各以班草對字有脫誤

者呼起立席後書有濫劣者飲墨水一升文理孟浪者奪席脫容刀初東魏元象中文襄王高澄秉政攝吏部尚書乃革後魏崔亮年勞之制務求才實自遷鄴以後掌大選知名者不過數四文襄年少高朗其弊也疎袁聿修沈密謹厚所傷者細楊遵彥風流辯給所取失於浮華唯辛術才明簡實新舊參舉管庫必擢門閥不遺衡鑑之美一人而已孝昭帝皇建二年詔內外執事官從五品以上三府主簿錄事參軍諸王文學侍御史廷

尉三官尚書郎中中書舍人每在三年之內各舉一人或夙在朝倫沈屈未用或先官後進今見停散或白屋之人巾褐未釋其高才良器允文允武理識深長幹具通濟操履凝峻學業宏贍諸如此輩隨取一長無待兼資方充舉限未薦之文指論事實隨能量用必陳所堪不得高談謬加褒飾所舉之人止在一職三載之內有犯死罪以下刑罪以上舉主准舉人之犯各罰其金自鞭以下舉主勿論若未經三載而更餘轉通計後官日

月合滿三周凡所舉人必主事立功裨益時政不限年之遠近舉主之賞亦當非次被舉之人別當擢授其違限不舉依式罰金又擁旄作鎮任總百城分符共理職司千里凡其部統理宜委悉刺史於所管之內下郡太守縣令丞尉府佐錄事參軍以降州官州官都主簿以下但沾在吏職及前為官并白人等並聽表薦太守則曹掾以下及管內之人亦聽表舉其大州中州下州畿內上郡中郡並三年之內各舉一人其不入品州并自

餘郡守不在舉限

後周以吏部中大夫一人掌選舉

小吏部下大夫一人以貳之初霸府時蘇綽為六條詔

書其四曰擢賢良綽深思本始懲魏齊之失罷門資之

制其所察舉頗加精慎及武帝平齊廣收遺逸乃詔山

東諸州舉明經幹理者上縣六人中縣五人下縣四人

至宣帝大成元年詔州舉高才博學者為秀才郡舉經

明行修者為孝廉上州上郡歲一人其刺史僚佐州吏

則自署府官則命於朝廷 隋文帝開皇七年制諸州

歲貢三人工商不得入仕開皇十八年又詔京官五品以上及總管刺史並以志行修謹清平幹濟二科舉人牛弘為吏部尚書高構為侍郎選舉先德行次文才最為稱職當時之制尚書舉其大者侍郎銓其小者則六品以下官吏咸吏部所掌自是海內一命以上之官州郡無復辟署矣自後周以降選無清濁及盧愷攝吏部尚書與侍郎薛道衡陸彥師等甄別物類頗為清簡而譖訴紛紜愷及道衡皆除名煬帝始建進士科又制百

官不得計考增級其功德行能有昭然者乃擢之大業三年始置吏部侍郎一人分掌尚書職事時武夫參選多授文職大業八年詔曰項自班朝治人乃由勲敘拔之行陣起自勇夫蠹政害人實由於此自今以後諸授勲官者並不得授文官之職事 唐貢士之法多循隋制其常貢之科有秀才有明經有進士有明法有書有算自京師郡縣皆有學焉每歲仲冬郡縣館監課試其成者長吏會屬僚設賓主陳俎豆備管絃既餞而與計

偕其不在館學而舉者謂之鄉貢舊令諸郡雖一二三人之限而實無常數到尚書省始由戶部集閱而關於考功課試可者為第

武德舊制以考功郎中監試貢舉貞觀以後則考功貞外郎專掌之

初秀才科等最高試方略策五條有上上中上下中上凡四等貞觀中有舉而不第者坐其州長由是廢絕自是士族所趣嚮唯明經進士二科而已其初止試策貞觀八年詔加進士試讀經史一部至調露二年考功貞外郎劉思立始奏二科並加帖經其後又加老子孝

經使兼通之永隆二年詔明經帖十得六進士試文兩

篇職文律者然後試策武后載初元年二月策問貢人

於洛城殿數日方了殿前試人自此始長壽三年制始

令舉人獻歲元會列於方物前以備充庭

因左拾遺劉承慶上疏奏

四方珍貢列為庭實而舉人不廁甚非尊賢之意上從之

長壽二年太后自製臣軌

兩篇令貢舉習業停老子長安二年教人習武藝其後

每歲如明經進士之法行鄉飲酒禮送於兵部

開元十九年詔

武舉人與明經進士同行鄉飲酒禮

其課試之制畫帛為五規置之於堦

去之百有五步

內規廣六尺極廣六尺餘四規每規內兩邊各廣三尺縣高以三十尺為限

列坐引射名曰長垛

弓用一石力箭重六錢

又穿土為埒其長與

埒均綴皮為兩鹿歷置其上馳馬射之名曰馬射

鹿子長五

寸高三寸弓用七斗以上力

又斷木為人戴方版於頂上凡四隅人

互列埒上馳馬入埒運槍左右觸必版落而人不踣名

曰馬槍

槍長一丈八尺徑一寸五分重八觔其木人上版方二寸五分

皆以儼好不失

者為上兼有步射穿札翹關負重身材言語之選通得五上者為第其餘復有平射之科不拘色役高第者授

以官其次以類升又制為土木馬於里閭間教人習騎
天寶六年正月制文武之道既唯並用宗敬之儀不可
獨闕其鄉貢武舉人上省先令謁太公廟每拜大將及
行師尅捷亦宜告廟神龍二年二月制貢舉人停臣軌依舊習老

子開元八年七月國子司業李元瓘上言三禮三傳及
毛詩尚書周易等並聖賢微旨生人教業必事資經遠
則斯道不墜今明經所習務在出身咸以禮記文少人
皆競讀周禮經邦之軌則儀禮莊敬之楷模公羊穀梁
歷代崇習今兩監及州縣以獨學無友四經殆絕事資

訓誘不可因循其學生請停各量配作業并貢人參試
之日習周禮儀禮公羊穀梁並請帖十通五許其入第
以此開勸即望四海均習九經該備從之二十一年明
皇新注老子成詔天下每歲貢士減尚書論語策而加
老子焉二十四年制移貢舉於禮部以侍郎掌之

因考功負

外郎李昂詆訶進士李權文章大為權所陵
詬朝議以郎官地輕故移於禮部遂為永制二十五年

二月制明經每經帖十取通五以上免舊試一帖仍按
問大義十條取六以上免試經策十條令答時務策三

道取粗有文理者與及第其進士停小經准明經帖大經十帖取通四以上然後准例試雜文及策考通與及第其明經中有明五經以上試無不通者進士中兼有精通一史能試策十條得六以上者奏聽進止其應試進士等唱第訖其所試雜文及策送中書門下詳覆

禮部

侍郎姚
奕奏

明皇方弘道化至二十九年始於京師置崇元

館諸州置道學生徒有差

京都各百人諸州無常負習
老莊文列謂之四子蔭第與

國子謂之道舉舉送課試與明經同凡舉司課試之法

帖經者以所習經掩其兩端中間開惟一行裁紙為帖

凡帖三字隨時增損可否不一或得四或得五得六者

為通

後舉人積多故其法益難務欲落之至有帖孤章絕句疑似參互者以惑之甚者或上抵其注下餘

一二字使尋之難知謂之例拔既甚難矣而舉人則有驅懸孤絕索幽隱為詩賦而誦習之不過十數篇則難者悉詳矣其於平文大義或多牆面焉

天寶元年明經停老子加習爾雅

十一載禮部侍郎楊俊始開為三行

不得帖斷絕疑似之言也

明經

所試一大經及孝經論語爾雅帖各有差帖既通而口

問之一經問十義得六者為通問通而復試策凡三條

三試皆通者為第進士所試一大經及爾雅

舊制帖一小經并注

開元二十五年改帖大經其爾雅亦并帖注

帖既通而後試文試賦各一篇

文通而後試策凡五條三試皆通者為第

經策全通為甲第通四以

上為乙第通三帖以下及策全通而帖經文不明法試通四或帖經通四以上而策不通四皆為不第

律令各十帖試策共十條

律七條令三條

全通為甲通八以上

為乙自七以下為不第書者試說文字林凡十帖

說文六帖

字林四帖

口試無常限皆通者為第算者試九章海島孫子

五曹張丘建夏侯陽周髀五經綴術緝古帖各有差

九章

三帖五經等七部各一帖綴術六帖緝古四帖兼試問大義皆通者為第凡衆

科有能兼學則加超獎不在常限按令文科第秀才與明經同為四等進士與明法同為二等然秀才之科久廢而明經唯有甲乙丙丁四科進士有甲乙二科自武德以來明經唯有丁第進士唯乙科而已開元以後四海晏清士無賢不肖恥不以文章達其應詔而舉者多則二千人少猶不減千人所收百纔有一寶應二年六月禮部侍郎楊綰奏諸州每歲貢人依鄉舉里選察秀

才孝廉敕旨州縣每歲察孝廉取在鄉間有孝弟廉恥
之行薦焉委有司以禮待之試其所通之學五經之內
精通一經兼能對策達於理體者並量行業授官其明
經進士道舉並停旋復故貞元二年六月敕自今以後
其諸色舉選人中有能習開元禮者舉一人同一經例
選人不限選數許集問大義一百條試策三道全通者
超資與官義通七十條策通兩道以上者不在放限其
有散試官能通者亦依正貢例處分五年五月敕自今

以後諸色人中有習三禮者前資及出身人依科目選

例吏部考試白身依貢舉例禮部考試每經問大義三十條試策三道所試大義仍委主司於朝官學官中揀擇精通經術三五人聞奏主司與同試問義策全通為上等特加超獎大義每經通二十五條以上策通兩道以上為次第依資與官如先是貢外試官者聽依正貢例其諸學生願習三禮及開元禮者並聽仍永為常式九年五月敕其習開元禮人問大義一百條試策三道

全通者為上等大義通八十條以上策兩道以上為次第餘一切並准三禮例處分仍永為常式其選授之法亦同循前代凡諸王及職事正三品以上若文武散官

二品以上及都督都護上州刺史之在京師者冊授

諸王

及職事二品以上若文武散官一品並臨軒冊授冊用竹簡書用漆五品以上皆制授六

品以下守五品以上及視五品以上皆敕授凡制敕授及冊拜皆宰相進擬自六品以下旨授其視品及流外官皆判補之凡旨授官悉由於尚書文官屬吏部武官

屬兵部謂之銓選凡選始於孟冬終於季春其擇人有

四事一曰身

取其體貌豐偉

二曰言

取其言詞辯正

三曰書

取其楷法道美

四

曰判

取其文理優長

四事皆可取則先德行德均以才才均以

勞其六品以降計資量勞而擬其官五品以上不試列
名上中書門下聽制敕處分凡選始集而試觀其書判
已試而銓察其身言已銓而注詢其便利而擬其官已
注而唱示之不厭者得反通其辭他日更其官而告之
如初又不厭者亦如之三唱而不厭聽冬集厭者以類

相從攢之為甲先簡僕射乃上門下省給事中讀之黃
門侍郎省之侍中審之不審者皆得駁下既審然後上
聞主者受旨而奉行焉各給以符而印其上謂之告身
其文曰尚書吏部告身之印自出身之人至於公卿皆
給之武官則受於兵部兵部武選亦然課試之法如舉
人之制取其軀幹雄偉應對詳明有驍勇才藝及可為
統帥者若文吏求為武選取身長六尺以上籍年四十
以下強勇可以統人者武夫求為文選取書判精工有

理人之才而無殿犯者凡官已受成皆殿庭謝恩其黔
中嶺南閩中郡縣之官不由吏部以京官五品以上一
人充使就補御史一人監之四歲一往謂之南選凡居
官以年為考六品以下四考為滿自高宗麟德以後承
平既久人康俗阜求進者衆選人漸多總章二年裴行
儉為司列少常伯始設長名姓歷勝引銓注之法又定
州縣官資高下升降以為故事其後莫能革焉至明皇
開元中行儉子光庭為侍中以選人既無常限或有出

身二十餘年而不獲祿者復作循資格定為限域凡官
罷滿以若干選而集各有差等卑官多選高官少選賢
愚一貫必合乎格者乃得銓授自下升上限年躡級不
得踰越久淹不收者皆荷之謂之聖書雖小有常規而
掄才之方失矣

此起於後魏崔亮停年之制也

其有異才高行聽擢不

次然有其制而無其事有司但守文奉式循資例而已
初吏部選才將親其人覆其吏事始取州縣案牘疑義
試其斷割而觀其能否此所以為判也

按顯慶初黃門侍郎劉祥道上

疏曰今行署等勞滿唯曹司試判不簡
善惡雷同注官此則試判之所起也
後日月浸久選

人猥多案牘淺近不足為難乃採經籍古義假設甲乙
令其判斷既而來者益衆而通經正籍又不足以為問
乃徵僻書曲學隱伏之義問之惟懼人之能知也佳者
登於科第謂之入等其甚拙者謂之藍縷各有升降選
人有格限未至而能試文三篇謂之宏詞試判三條謂
之拔萃亦曰超絕詞義者得不拘限而授職初州縣混
同無等級之差凡所拜授或自大而遷小或始近而後

遠無有定制其後選人既多敘用不給遂累增郡縣等

級之差

郡自輔至下凡八等縣自赤至下凡八等

武德中天下兵革方息萬

姓安業士不求祿官不充負吏曹乃移牒州府課人應集至則授官無所退遣四五年間求者漸多方稍有沙汰貞觀中京師穀貴始分人於洛州選集參選者七千人而得官者六千人時太宗謂吏部尚書杜如晦曰今吏部取人獨舉其言辭刀筆而不詳才行或授職數年然後罪彰雖刑戮繼及而人已弊矣如之何對曰昔兩

漢取人必本於鄉閭選之然後入官是以稱漢為多士
今每歲選集動踰數千人厚貌飾辭何可知也選曹但
校其階品而已若掄才辨行未見其術上由是將依漢
法令本州辟召會功臣議行封建事乃寢他日上又曰
夫古今致理在於得賢今公不能知朕不徧識日月其
逝而人遠矣吾將使人自舉如之何魏徵曰知人則智
自知則明知人誠難矣而自知豈易乎且自媒自衒士
女之醜行是長澆競也不可復寢 增天寶九載敕吏

部取人必限書判古來良宰豈必文人自今後但才堪

政理方圓取人不得限以書判

冊府元龜

十三載御勤政樓

試四科舉人其詞藻宏麗問策外更試詩賦各一道制

舉試詩賦自此始

文獻通考

敕嶺南五府管內白身有詞藻

可稱者每至選補時任令應諸色鄉貢舉仍委去使准

予考試有堪及第者具狀聞奏代宗寶應三年罷貢孝

悌力田及童子科永泰元年詔不許百姓任本貫州縣

官及本貫鄰縣官京兆河南府不在此限德宗建中元

年制常參官授訖三日內於四方館上表讓一人自代其外官委長吏附送其表付中書門下每官闕以舉多者授之

冊府元龜

貞元八年始令吏部每年集選人舊事吏

部每年集人其後遂三年一置選人猥至真偽紛雜選士一蹉跌或至十年不得官而官之闕者或累歲無人陸贄時為相令吏部分内外官負為三分計闕集人以為常其弊十去七八天下稱之

韓愈順宗實錄

十八年敕考試

所收明經不得過一百人進士不得過二十人如無其

人不必要滿此數憲宗元和時明經停口義試墨義十

條其常坐法及為州縣小吏雖藝文可采勿舉又諫議

大夫殷侑言比來史學多廢至有身處班列而朝廷舊

章莫能知者於是立史科三傳科

文獻通考

穆宗長慶元年

有日試百篇二人文宗太和元年有日試百篇童子又

有日試萬言者

唐登科記

七年中書門下奏今後請京兆河

南尹及天下刺史各於常選人中擇堪為縣令司錄錄

事參軍人聞薦觀察使申送吏部至選集日不要就選

場更試書判吏部尚書侍郎引詣銓曹試時務狀一道

訪以理民之術其理識優長者便以大縣注擬

文獻通考天

復元年令中書門下選擇新及第進士有久在名場年

齒已高者不拘常例各授一官禮部奏揀到新及第進

士陳光問年六十九曹松年五十四王希禹年七十三

劉象年七十柯崇年六十四鄭希顏年五十九時謂此

舉為五老榜天祐元年敕應天下州府令錄並委吏部

三銓注擬中書並不除授

文獻通考

宋制國初制舉有賢

良方正能直言極諫經學優深可為師法詳閑吏理達於教化凡三科太祖建隆四年詔自前藩鎮多奏初官人為掌書記頗越資序自今歷兩任有文學者方得奏

舉

文獻通考

太宗太平興國元年先是選人試判三道考為

三等二道全通一道稍次為上一道全通二道稍次為中三道全次為下判上者加一階判中依資判下降一資至是詔增為四等以三道全次者為中下以三道全不通者為下殿一選八年詔自今應臨軒所選官吏並

送中書門下考其履歷審取進止又試進士始分三甲

第一甲並知縣雍熙二年令考官親戚別試是年親試

舉人初唱名賜第淳化三年蘇易簡知舉殿試始令糊

名真宗咸平元年詔禮部放榜得高麗賓供一人又詔

吏部銓凡注諸縣令佐勿得全用流外四年詔省臺諸

司四品以上於內外京朝幕府州縣官草澤中各舉賢

良方正一人

文獻
通考

仁宗天聖間從夏竦之奏增重制科

之目於是自賢良方正以下其科為六自書判拔萃以

下其科為四驗之以進策十卷先之以過閣六論薦之

以侍從糾之以臺諫

錦繡萬
花谷

天聖七年詔復制科大中

祥符元年曾罷此科於是增其名曰賢良方正能直言

極諫博通墳典明於教化才識兼茂明於體用詳明吏

理可使從政識洞韜略運籌帷幄軍謀宏遠材任邊寄

凡六以待京朝官之被舉者又置書判拔萃以待選人

之應書者又高蹈丘園沈淪草澤茂才異等以待布衣

之被舉及應書者又武舉以待勇略之士仁宗即位以

童子賜出身者凡十人寶元元年以為無補而罷之慶
歷四年參知政事范仲淹等請復古興學校取士本行

實乃詔州縣立學本道使者選屬部為教授不足則取
於鄉里之有道業者士須在學三百日乃聽預秋賦舊
嘗充賦者百日而止初保寧軍推官胡瑗教授湖州諸
生信愛如其子弟至是下湖州取其法著為學令六年
策武舉馮維師奏以策為去留弓馬為高下嘉祐二年

親試舉人凡進士與殿試者始免黜落

文獻
通考

三年詔禮

部三歲一貢舉

文獻通考

二年王安石請興建學校以復古

乃罷明經及諸科進士罷詩賦各占治詩書易周禮禮

記一經兼以論語孟子每試四場初大經次兼經大義

凡十道次論一首次策三道禮部試即增二道試義者

須有文采乃為中格不但如明經墨義粗解章句而已

按此為今制義之始

又陳升之拜相循例為侯叔獻程顥皆與堂

除又陞一任帝曰薦士不考才實以輔臣故例得進秩

此何為也於是罷兩府初入舉官之制五年詔堂選堂

占悉罷又詔宗室非袒免親許應舉補官七年呂惠卿
以為制科止於記誦非義理之學乃詔罷之八年頒王
安石詩書周禮義於學宮謂之三經新義哲宗元祐時
詔大臣奏舉館職並如制召試除授其朝廷特除不用
此令元年復制科二年更科場法進士分四場第一場
試本經義二道語孟義各一道第二場賦及律詩各一
首第三場論一道四場子史時務策三道紹聖元年又
詔進士罷詩賦專習經義又罷制科置宏詞科四年改

為詞學兼茂科

改宏詞之名

八年嘉王楷考在第一不欲令

魁多士升次名王昂為首政和六年吏部取在選應入

者隨其資序自上而下不以願否徑自差注遂有貫戶

福建而強注四川者上知其遠難赴特許改注

文獻通考

高

宗一朝童子求試者三十有六人唯朱虎臣能排陣射

生及誦七書故補承信郎召見又賜金帶以寵異之建

炎元年追復祖宗故事於科舉外有文武傑特者試而

官之建炎二年呂頤浩言近世堂除多侵部注士人失

職宜倣祖宗故事外自監司郡守內自察官省郎已上
武臣自準備將領正副將已上並歸部注從之二十二
年議者以進士登科門蔭子弟纔沾一命不復參部多
干堂除習紊銓法詔禁之紹興元年下詔復賢良方正
直言極諫科文獻通考三年兼吏部尚書常益言乾德詔曰
自今常調集選人吏部南曹取歷任中多課績而無闕
失其人才可擢者其名送中書引驗加獎是尚或任人
不專任法也其後官制釐改典選不得以意從事振拔

幽滯無復聞焉望稽用乾德詔書凡常調中材行可取者許長貳具名以聞

玉海

二十九年四川類省試始降敕

差官孝宗垂意武舉科以授官與文士不類詔自今倣進士甲科恩例隆興元年詔選人歷十二考已上無贓私罪與減舉主一負乾道元年詔舉賢良方正先是學士汪應辰以睢州布衣李廔應詔上覽其文稱獎會有沮之者不果試是歲宰相虞允文為上言之始依元祐獨試故事十一月上親策於集英殿有司考入第四等

賜制科出身授節度推官其策依正奏名第一甲例謄
寫進御及德壽宮二年令科舉前一歲量留司戶簿尉
職官教官以待黃甲進士七年虞允文請辛巳以來歸
正人依倣祖宗陝西河北赴南省試別立號取人從之
光宗初議者云省試春令尚淺天寒晷短遇風雪則硯
冰筆凍請展至二月朔而殿試則於四月初從之寧宗
慶元中制初改官人必作令謂之須入今除殿試上三
名南省元外並令作邑

文獻通考

嘉定八年詔大郡歲舉廉

吏二人小郡一人十年詔由武舉進者復應文舉理宗

寶慶元年詔舉賢良之士四年詔令內而侍從臺諫兩

省卿監郎官外而監司帥守舉文武之臣曉暢兵機練

習邊事才略卓然可用者各二人度宗咸淳二年太傅

陳壽孫乞太學增試弘詞科五年詔吏以廉稱今寂無

聞其令侍從卿監郎官各舉所知

續文獻
通考

金天會八

年太宗以東平童子劉天驥七歲能誦詩書易禮春秋

左氏傳及論語孟子命教養之熙宗即位之二年詔闢

貢舉

金史

世宗大定二年詔隨朝六品外路五品以上官

各舉廉能官一員

續文獻通考

九年選女直學生異等者百

人薦於京師廩給之命溫特赫廸木丹教以古書作詩策

後復試得圖克坦鎰以下三十餘人

金史

十一年制凡廉能

官四品以下委官覆實同則升擢三品以上以聞朕自

處之

續文獻通考

章宗明昌元年創制舉有賢良方正能直

言極諫博學宏材達於從政等科益都府申童子劉佳

兒年十一歲能詩賦誦大小六經乞依宋童子李淑賜

出身上召至內殿試鳳凰來儀賦魚在藻詩上嘉之賜

本科出身令肄業太學

金史

九月以廉能擢北海縣令張

翔等十八人

續文獻通考

金取士之科試詞賦經義策論中

選者謂之進士律科經義中選者曰舉人凡詞賦進士

試賦詩策論各一道經義進士試所治一經義論策各

一道元世祖十五年命行中書省吏廉能者舉以聞

十八年詔求山林隱逸之士十九年中丞崔彥言選用

臺察若由中書必有偏徇合從本臺官選擇因敕御史

臺得選御史

續文獻
通考

二十八年詔路府州縣除達嚕噶

齊外長官並宜選用漢人素有聲望及勲臣故家并儒

吏出身資品相應者佐貳官遴選色目漢人參用

元成
史

宗大德三年立選官之法從七品以下屬吏部正七品

以上屬中書三品以上非有司所予奪由中書取進止

七年議文翰師儒難同常調翰林院宜選通經史能文

詞者國子學宜選年高德劭能文辭者須求資格相應

之人不得預保八年詔父子兄弟有才者並居風憲九

年詔孝子順孫堪從政者量才任之仁宗皇慶元年中書省言今春以內降旨除官千餘人其中欺偽豈能悉知壞亂選法莫此為甚帝曰凡內降旨一切勿行

續文獻通

考

二年詔曰三代以來取士各有科目要其本末舉人

宜以德行為首試藝則以經術為先詞章次之其以皇慶三年八月天下郡縣興其賢者能者充賦有司次年二月會試京師中選者朕將親策焉科場每三歲一開舉人從本貫官司於諸色戶內推舉考試程式蒙古色

目人第一場經問五條大學論語孟子中庸內設問用
朱氏集註第二場策一道以時務出題漢人南人第一
場明經經疑二問大學論語孟子中庸內出題並用朱
氏集註復以已意結之經義一道各治一經詩以朱氏
為主尚書以蔡氏為主周易以程朱氏為主三經兼用
古註疏春秋用三傳及胡氏傳禮記用古註疏不拘格
律第二場古賦詔誥章表内科一道古賦詔誥用古體
章表四六參用古體第三場策一道經史時務內出題

鄉試八月二十日二十三日二十六日會試二月初一

日試第一場初三日第二場初五日第三場御試三月

初七日元史是年丞相特們德爾平章李孟等奏下第舉

人七十以上與從七品流官六十以上與教授延祐元

年敕各省平章訪求遺逸苟得其人先以名聞而後致

之泰定帝泰定四年敕國子監歲貢生負業成者六人

文宗至順三年監察御史陳思謙言古者刺史入為三

公郎官出宰百里蓋使外職識朝廷治體內官知民間

利病今後歷縣尹有能聲善政者授郎官御史歷郡守
有奇才異績者任憲使尚書上命中書議行之順帝至
元元年已延請內外官悉循資銓注毋得保舉澀滯選
法從之又詔罷科舉六年復科舉請州府隸省部者儒
學教授選本管儒戶子弟入學讀書習業遇按察司本
路總管府歲貢之時於學生內選禮義修明文學優瞻
者解貢

此歲貢之始
續文獻通考

明太祖洪武三年詔開科舉使

中外文臣皆由科舉而進京師及各行省鄉試八月初

九日初場後三日試第二場又三日試第三場初場經義二道四書義一道第二場論一道第三場策一道中式者復以騎射書算律五事試之又詔凡鄉試中者行省咨中書省判送禮部會試額取舉人百名四年詔各行省連試三年庶官足任使自後三年一舉六年詔天下鄉貢舉人罷會試開文華堂於禁中選舉人年少質美者肄業其中又罷科舉專用辟薦其目有明經行修懷才抱德賢良方正人材孝廉等十五年復開科十六

年奏准天下府州縣學歲貢生貢各一人俱限正月至

京從翰林院試經義四書義各一道判語一條中式者

發國子監不中者罰充吏十七年頒行科舉成式三年

大比子午卯酉年鄉試辰戌丑未年會試第一場試四

書義三道經義四道未能者許各減一道第二場試論

一道判語五條詔誥表内科一道第三場試經史時務

策五道未能者許減二道考試官皆訪明經公正之士

於儒官儒士內選用官出幣帛先期敦聘主文考試二

貢同考試官四貢成祖永樂三年命學士解縉等選新進士才識英敏者俾就文淵閣進學於是縉等選修撰曾棨編修周述周孟簡庶吉士楊相凡二十八人命司禮監給紙筆墨光祿給朝暮膳禮部月給膏燭工部擇附近第宅居之上或時至館中程試課業或召至便殿問以經史人莫不歆其榮七年令下第舉人再試送國子監進學仁宗洪熙元年上諭禮部曰科舉須南北兼收南人雖善文詞而北人厚重累科所選北人僅得什

一非公天下之道自今科場取士南取六分北取四分
又詔民間有行已廉正才堪撫字者許見任官舉薦宣
宗宣德二年令貴州就試雲南七年詔有文學才行出
衆之士令所在有司保舉赴京選用英宗正統二年令
開科不拘額數十四年詔各處舉到儒士照永樂年間
例送翰林院嚴加考試景泰四年奏准會試考官翰林
春坊專其事英宗天順二年令兩京天文生陰陽生及
官生子弟許就在京鄉試五年令天下生員年四十以

上者考選送國子監肄業憲宗成化六年令監臨等官
不許侵奪考官職掌七年中書舍人呂憲乞就順天府
鄉試從之又奏准有司官負薦舉仍令吏部先察舉主
孝宗弘治四年令各處提學官將教官考定等第以備
科舉聘取十四年南國子祭酒章懋疏奏資格所拘美
才多滯乞于常貢外令提學憲臣于人才素多處行選
貢之法不分廩膳增廣生員通行精選充貢武宗正德
十四年兵部題武舉鄉試初場試馬上箭二場試步下

箭三場試策一道兩京兵部官出題在外巡按御史出題從之世宗嘉靖元年命文舉鄉試之年巡按御史於十月考試武舉兩京武學於兵部月考優等選取俱送兵部會試於次年四月開科初九日初場較騎射十二日二場較步射十五日三場試策二道論一道六年張璁上言近來各省鄉試權歸簾外多通關節宜用京官臨時點差往典試事從之十四年巡按王吉奏貴州諸生附雲南道里艱阻請就本省開科從之

選舉三

原觀國

語郊

易觀國之光利用賓于王
禮記凡語於郊者必取賢斂才焉或以德進或以

事舉或以言揚

開律

獻書

衛臻典選舉蔣濟與書曰漢以亡虜為將周拔漁父為太師何

必守文荅曰古人遺智惠而任度量須考績而加黜陟
今予開拔奇之律使天下馳騁也周禮詳第二條

畫餅

給食

魏盧毓為吏部尚書諸葛誕鄧颺馳名譽有四聰八達之稱帝疾之時舉中書

侍郎詔曰莫須有名以名如畫地作餅言不可啖也
武帝詔吏人必有明當世之務習先儒之術者縣次給

食令與計偕注偕計吏也

鴻漸

鹿鳴

于陸于磐漸進之義選舉令諸貢人上州三人中

州二人下州一人必有才堪者不限其人數其
申送之日行鄉飲酒禮牲用少牢歌鹿鳴之詩
烝我

髦士

縻爾好爵

燕進也
好爵吾與爾縻之

易我有

輒啟數人

先

治百姓

山濤為僕射典選吏部並得其才再居十餘年
一官缺輒啟數人甄拔人物各為題目時稱曰

山公啟事也

王戎字濬沖領吏部始
為甲午制凡選舉先治百姓然後授用

內惡未發

州叛何妨

平帝詔諸有賊及內惡未發而薦舉者勿案
驗也孔坦字君平帝手敕問曰吳興徐馥

為賊殺郡將今應舉孝廉可否坦曰
罪不相及徐馥為逆何妨一郡之賢

仲舒發策

晁

錯充賦

武帝隆儒術及仲舒對策明孔氏抑百家興立
學校州郡舉孝廉茂才皆仲舒發之晁錯策

曰乃以臣

誠欲得真

以防請託

宣帝詔舉廉吏誠
欲得真也吏六百

石位左右有罪自今以來毋得注云不復舉為廉吏也

漢何武問文吏於儒者問儒者於文吏以相參驗除

吏先為科條以防請託

以貌以言宣父尚言有失則惠則哲

帝堯亦曰其難

增擘名

接脚

文獻通考曰貞元四年吏部奏艱難以來

年月積久兩都士類散在遠方三庫敕甲又經失墜因此人多罔冒吏或詐欺分見官者謂之擘名承已死者謂之接脚乞委觀察簡良俊舉才行
玉海曰樊僚使諸州府縣橫勘
永平元年上

言郡國舉孝廉率取年少能報恩者宿大賢多見廢棄宜敕郡國簡用良俊顯宗從之後漢書黃琬傳稍遷

五官中郎將時陳蕃為光祿勳數與議事舊制光祿舉三署郎以高功久次才德尤異者為茂材四行時權富

多得舉而貧約者見遺京師謠曰欲得不能光祿茂材于是琬蕃同心顯用志士劉醇朱山殷參等並以才行

蒙舉精篆籀通性理
續文獻通考元成宗大德五年大都提舉學校所舉張泰山精

篆籀 又英宗至治元年福州路連江縣舉陳天麟能通性理

前裴馬

後盧李

要會

曰唐典選有聲者前有裴馬謂行儉載後有盧李謂從愿朝隱

顏竣嗔

謝莊笑

文獻

通考曰顏竣為吏部尚書奏無不可後謝莊代竣意多不行竣容貌嚴毅莊風姿甚美人言顏竣嗔而予人官

謝莊笑而不予人官

造姓歷

為手籍

文獻通考曰李敬元為少常伯委事於貞外郎

張仁禕仁禕又造姓歷改狀樣銓歷等程式而銓綜之法密玉海曰王徽為尚書時銓選失序吏肆為姦微

為手籍以檢實遂無奸滯

獎茂秀

收寒素

孔帖曰王丘遷吏部侍郎典選號平允其

獎用皆一時茂秀又曰李固為吏部侍郎既領遷案籍自擬先收寒素杞吏姦

無所徇

倚為利

孔帖曰柳仲郢知吏部銓李德裕頗抑進士科仲郢無所徇又曰楊虞卿善諧麗權倖倚為

姦利歲畢選者皆走門下升沈在牙頰間當時有蘇景
胤張元夫而虞卿兄弟汝士漢公為人所弄故語曰欲
趨舉場問蘇張蘇
張猶可三楊殺我
止糟糠
後椽杙
上疏曰國之用

人如人用財貧者止糟糠富者餘粱肉故當衰弊之乏
則磨策朽鈍以取之太平多士則選揀髦俊而使之今
選者猥多宜以簡練為急又曰劉廙方調因進書曰
干霄蔽日巨樹也求尺寸之材必後於椽杙龍吟虎嘯
希聲也尚頰舌之感必下于蛙黷豈不悲乎執事誠能
先政事次文學退觀其治家進察其臨節則龐鴻深沈
之士亦可窺
其門閭矣
價逸蕭張
才膺管樂
冊府元龜曰顯
慶元年詔宜令

河南河北江淮以南州縣或緯俗之英聲馳管樂或濟
時之器價逸蕭張德宰帝師材堪棟輔者必當任之不
次又曰中宗神龍二年有才膺管樂科
張大求及第才高位下科馮萬石及第
長才廣度

抱器懷能

冊府元龜曰證聖元年長才廣度沈迹下僚科張河及第又曰景龍三年抱器懷

能科侯銘及第

藏名負俗

樂道安貧

冊府元龜曰睿宗景雲二年藏名負俗科

李俊文及第

又曰代宗大歷二年樂道安貧科楊膺及第

好學異能

博聞強

記冊府元龜曰貞觀十七年詔令州縣舉孝廉茂才好學異能卓犖之士又曰高宗乾符二年令天下諸

州舉鴻儒碩學博聞強記之士

隱居求志

躬畊研經

續文獻通考真德秀奏舉

遺逸趙蕃畧曰文林郎監潭州南嶽廟趙蕃蚤歲得官臨事有立年踰四十即上詞請隱居求志垂三十載矣

不求聞達正應詔旨敢以名聞

又曰衛涇奏舉布衣

胡大壯畧曰衡山縣布衣胡大壯故諡文定安國之孫

也研究經術博通墳典其持論以明義利為本其立已

以尚誠實為要隱居衡嶽躬畊自給邦人尊之曰西園

先生望聖慈
量才褒錄

不切事宜

未曾經歷

冊府元龜曰開元六年詔曰比

來選人試判舉人對策剖析案牘教陳奏議多不切事宜廣張華飾自今已後不得更然又曰九年敕如開

朝官子弟未曾經歷即坐要司恣行決罰妄作姦非刑憲不可偏矜父兄莫能訓導苟陷於法良軫於懷宜令

本司按實驗察有此色并少年未諳時事可移與閑慢官

每年赴集

四時聽選

冊府元龜曰開元二十一年詔曰頃者有司限數拘守循資凡人三十始可出身四十乃得從事若如所制之

文六十不離一尉由是取人豈為明恕自後選人每年總令赴集仍以三月三十日為限其中有才優業異操

行可明者一委吏部臨時擢用貴於取實何限常科孔帖曰劉林甫建官四時聽選隨到輒擬於是官無滯

人下意聽納隨才銓錄孔帖曰韋見素遷吏部侍郎官有丐求輒下意聽納

人多德之 又曰劉林甫歷吏部侍郎吏部調至萬負林甫隨材銓錄咸以為宜

最殿皆明

褒黜必當

孔帖曰劉晏知吏部三銓事最殿分明下皆惜伏 又曰崔郾遷吏部員外郎擬吏

親挾格褒黜必

留銓二千

除吏八百

玉海曰景雲元年宋璟為

當寒遠無留才

吏部尚書李乂盧從愿為侍郎皆不畏強禦請謁路絕集者萬餘人留者三銓不過二千人服其公事文類

聚曰常袞當國凡奏請一杜絕之無所甄別賢愚同滯及崔祐甫則薦舉惟其人未踰年除吏幾八百負莫不

諧允 封德彝推薦未嘗

李吉甫選用略盡

冊府元龜曰貞觀元

年帝謂尚書右僕射封德彝曰比來令卿舉賢才未嘗有所推薦天下事重宜分朕憂對曰臣愚豈敢不盡心但今所見實無奇才異行帝曰前代明王使人如器不借才於異代皆取士於當時何代無賢才但患遺之不

知耳 又曰李吉甫自翰林拜相將出之夕感恩出涕
謂學士裴垕曰吉甫流落遠地十餘年方歸後進彥士
罕接識者請垕疏其名得三十餘人數月
之內選用略盡當時翕然有得人之稱
披華發輝

舒翹揚英

玉海

漢置五曹

魏隆八凱

江總表

薪有

芄楫 河無伐檀

麟題信厚之族章敘于內

鷺羽

羣飛之賢夷儀于外

玉海

選舉四

增興賢

周禮使民興賢出使長之使民興能入使治之

舉能

尚書舉能其官惟爾之能稱匪

其人唯爾不任

原署行

議年

高帝詔云云年幾也行狀也

增詔補博

士弟子

文獻通考云元朔五年制詔補博士弟子郡國縣道邑有好文學故長上肅政教順鄉里出入

不悖所聞者令與計偕詣太常得受業如弟子

博士選三科

漢書云成帝時博士選三科高

為尚書次為刺史其不通政事以久次補諸侯太傅

雜舉充博士位

又云陽朔二年詔儒

林之官宜皆明於古今溫故知新通達國體丞相御史其與中二千石二千石雜舉可充博士位者

舉

可親民者

文獻通考云哀帝建平元年詔大司馬列侯中二千石州牧守相舉孝弟淳厚能直言通

政事延於側陋可親民者各一人

一封軺傳

又云孝平元始五年召天下通知逸經古記天

文歷算鍾律小學史篇方術本草及以五經教授者在所為駕一封軺傳遣詣京師至者數千

視事

未滿歲不得察舉孝廉

又云東漢之制郡國守相視事未滿歲不得察舉孝廉以其未

久不周知也

補令長丞尉

又云元初六年詔光祿勳與中郎將選孝廉郎寬博有謀清白

行高者五十人

奏增孝弟從政

又云順帝漢安元年尚書令黃瓊以前左

補令長丞尉

雄所上孝廉之選專用儒學文吏於取士之義猶有所遺乃奏增孝弟及能從政者為四科帝從之

奏

童子郎

又云後漢左雄奏召名儒為博士汝南謝廉河南趙建章年十二各能通經雄並奏為童子郎

漢法孝廉試經者拜為郎年幼才俊者拜為童子郎

舉敦樸

後漢書云馬融舉敦樸對策於北宮

端門依科罷者為太子舍人

又云初平四年試儒生四十餘人上第賜位下第者

罷之詔曰今耆儒年踰六十去離本土結髮入學白首空歸朕甚愍之其依科罷者聽為太子舍人

原

莫不廉節

魏太祖為丞相司空毛玠為東曹掾與崔琰並典選舉所用皆清心之士雖于時有盛名

而行不由本者終莫能進務以儉率人由是天下莫不以廉節自勵雖貴寵之家車服不敢過度和洽言於公曰儉素過中自以處身則可今朝廷之議吏有著新衣乘好車者不謂之廉潔至令士大夫故污其衣藏其與服朝府大吏或自挈壺飧以入官寺凡詭激之行則容偽矣

增舉賢良篤行

文獻通考

云魏明帝青龍元年詔六卿舉賢良篤行之士各一人

六條舉淹滯

晉書云魏元熙三年

令諸郡中正以六條舉淹滯一曰忠恪匪躬二曰孝敬盡禮三曰友于兄弟四曰潔身勞謙五曰信義可復六曰學以執九品銓十六州

玉海云孫尹表曰司徒魏舒兼執九品銓十六州不

以為

原不抑寒素

王蘊為吏部郎不抑寒素每一官缺求者十輩無所是非連狀白之

某人有地某人有才各隨其方不得者不怨之也

增官人之難

文獻通考云裴子野曰官

人之難尚矣居家視其孝友鄉黨察其誠信出入觀其志意憂難取其智謀煩之以事以求其理臨之以利以

察其

南院選式

玉海云長安志故事歲揭版南院為選式選者自通一辭不如式輒不得

廉

調有十年
不官者

月露風雲

資治通鑑云侍御史李諤以選才失中上書曰自魏之三祖更

尚文詞江左齊梁其弊彌盛貴賤賢愚唯務吟詠競一韻之奇爭一字之巧連篇累牘不出月露之形積案盈

箱唯是風雲之狀代俗以此相高朝廷據茲擢士於是閭里童昏貴遊總角未窺六甲先製五言捐本逐末澆

滴愈

不能答皇王政術

文獻通考云貞觀十八年引汴鄭諸州所舉孝廉賜坐御

扇

前問以皇王政術及皇太子問以曾參說孝經並不能答太宗曰海內賢哲將無其人耶朕甚憂之

上

州二人下州一人

冊府元龜曰高宗即位詔其有經明行修談講精熟具此師嚴才堪教胄

者忠節高妙適用清通博聞強記終堪卿輔者遊情文藻下筆成章援心處事端平可紀者疾惡揚善依忠履義執持典憲終始不移者京師長官及上州各舉二人中下州各舉一人

兼試經史

冊府元龜

云總章二年敕諸色考滿入流人並兼試一經史然後授官

識文律者然後試策

又云永隆二年詔曰學者立身之本文者經國之資豈可假以虛名必須徵其實效聞明經射策不讀正經抄撮義條纔有數卷進士不尋史傳唯誦舊策共相模擬本無實才考試之日曾不簡練試官又加顏面或容假手更相囑請莫憚糾繩興廉舉孝因此失人簡賢任能無方可致自今已後考功試人明經試帖取十帖得六以上者進士試雜文兩首識文律者然後並令試策其明法并書算貢舉人亦量准此例即為常式

舉

刺史縣令

冊府元龜云景龍三年令內外五品以上舉堪任刺史縣令者

舉將軍都

督刺史

又云睿宗太極元年命文武官五品以上各舉才堪將軍及邊州都督刺史一人

歷

州縣擬臺省

文獻通考云明皇即位勵精為治制凡官不歷州縣不擬臺省

鏡妍姪

衡輕重

唐書云魏知古先天二年冬令往東都知吏部尚書事上深以為稱職手制曰卿以宰臣往知

大選遂能端本革弊忘私徇公正色而行措心不撓鏡已激則妍姪必鑒衡已舉則輕重罔違朕遠聞之益用

嘉歎吏部兵部一時精選玉海云張九齡用嚴挺之知吏部選陸景融知兵部選皆

為一時精選

武選亦治

又云姚元之為兵部尚書陸象先盧懷慎為侍郎武選亦治

免任散官

冊府元龜云開元十六年國子監祭酒楊瑒奏今之明經習左氏者十無一二恐左氏之

學廢又周禮儀禮公羊穀梁亦請量加優獎遂下制明經習左氏及通周禮等四經者出身免任散官

李林甫賀野無留才

孔帖云李林甫時帝詔天下士有一藝者得詣闕就選林甫恐士對

策斥已即建言士皆草茅未知禁忌徒以狂言亂聖聽請悉委尚書省長官覆試無一中程者林甫因賀上野

無留

不以親故自嫌

文獻通考云肅宗即位於靈武以崔渙同中書門下平章事時

才

京師未復舉選不至詔渙為江淮選補使收米遺逸不以親故自嫌常曰抑才虞謗吾不忍為

一榜

盡除京官通判

聞見錄云太祖幸西都張齊賢獻十策帝歸謂太宗曰吾幸西都為汝得一賢

宰相太宗即位齊賢方赴廷試帝欲其居上第有司置於丙科帝不悅敕一榜盡除京官通判

貢八

行

玉海云大觀元年詔士孝悌睦姻任恤忠和八行貢入太學大司成考驗取旨釋褐

選法如

權衡

山堂肆考云宋王質字子野判吏部銓選號為稱職而選法未嘗更易人或問之曰選法備具如權

衡在執者不欺其輕重耳何必屢更

吏不得逞

言行錄云蘇頌判吏部尚書前後掌天官四選

凡五年每選人改官關陞其磨勘吏洗垢求瑕故為稽滯公謂吏曰某官緣某事當會某處仍引用合用條例及具委無漏落狀同上自是吏不得逞

始於皇統

又云金武舉始於皇統時其制則詳於泰

和式有上中下三等

奏孝行

又云章宗明昌三年有司奏寧海州文登縣王震孝行以常業進士

并試其文特賜同進士出身

四書大義

元史云泰定四年福州舉葉留畊問以四書大義對

曰無過事父母能竭其力事君能致其身

試大書

續文獻通考曰李東陽長沙人五歲以奇童舉

明景帝召試大書屬對喜甚詔入京府學肄業

薦舉才行

續文獻通考云景泰三年詔各處見

任官負果有才行政事優長拘於資格屈在下僚者並聽在內四品以上在外巡撫巡按方面正官薦舉赴京

所舉人後犯賊
罪連坐舉主

選舉五

增詩唐馬異送皇甫湜赴舉曰馬蹄聲得得去入天子
國借問去是誰秀才皇甫湜含吐一腹文八音兼五色
主文有崔李郁郁為朝德青銅鏡必明朱絲繩必直稱
意太平年念子長相憶 宋王元之聖上親試貢士歌
曰天王出震寰宇清奎星燦燦昭文明詔令郡國貢多
士大張一網羅羣英聖情孜孜終不倦日斜猶御金鑾

殿宮柳低垂三月煙爐香飛入千人硯麻衣皎皎光如
雪一一重瞳親鑒別孤寒得路荷君恩聚首皆言盡臣
節

增書元陳祐三本書曰今之議者互有異同或以選舉
為盡美而賤科第或以科第為至公而輕選舉皆非古
今之通論也夫二帝三王以下隋唐以上數千百年之
間明君睿主所得社稷之臣王霸之輔蓋亦多矣或起
之於耕耘或求之於版築或獵之於屠釣或遇之獻言

而入侍或由薦進而登朝至於賢良方正直言孝廉貢
舉之著遭際萬殊不可勝紀豈一出於科第乎自隋唐
以降迄於宋金數百年間名臣偉器例皆以科第進豈
皆一出於選舉乎及乎遇合於君聚精會神於朝廷之
上皆能尊主庇民論道佐時寧復有彼優此少之間哉
夫士之處世亦猶魚之處水今魴之在河鯉之在洛其
取之之術固有筌罾罟釣之不同期於得魴鯉則一也
增疏陸贄疏曰理道之急在於得人而知人之難聖哲

所病聽其言則未保其行求其行則或遺其才校勞考則巧偽繁興而端方之人罕進狗聲華則趨競彌長而沈退之士莫勝自非素與交親備詳本末探其志行閱其器能然後守道藏用者可得而知沽名飾貌者不容其偽是以前代有鄉里舉選之法長吏辟舉之制所以明歷試廣旁求證行能息馳騫也昔周以伯冏為太僕命之曰慎簡乃僚罔以巧言令色便僻側媚其惟吉士是則古之王朝命其大官而大官得自東僚屬之明驗

也臣待罪宰相即以上陳求賢審官粗立綱制凡是百
司之長兼副貳等官及兩省供奉之職并因察舉勞效
須加獎任者並宰臣敘擬以聞其餘臺省屬僚請委長
官選擇指陳才實以狀上聞一經薦揚終身保任各於
除書之內具舉授之由得賢則進考增秩失實則奪俸
贖金亟副則褒升亟失則黜免非止搜揚下位亦可閑
試大官前志所謂達則觀其所舉即此義也

御定淵鑑類函卷一百三十七

欽定四庫全書

御定淵鑑類函卷一百三十八

政術部十七

貢舉

貢舉一

原登龍 退鷁 位列春官 職司貢舉 天子求賢

諸侯貢士 敷求多士 精選羣材 盛矣會府

直哉主司 精鑒茂才 明試諸難 懸甲乙之科

拾青紫之士 握靈蛇而來 中正鵠而取 禮闈之

司重其任 文囿之主難其人 撞鐘之鳴以待下問

止水之鑒寧遺上才 職當可試惟慮遺才 經苟

未明難用拾芥 守明試之司豈宜失士 當文思之

代必待得賢 楊葉不穿雖十上而下第 桂枝可折

以三道而登科 增春闈 夏課李肇國史補曰進士籍而入選謂之春闈

不捷而執業以 出謂之夏課 賜餅 折花洛中紀異曰僖宗幸南內興慶池方食餅餠時

進士在曲江有聞喜宴上命依人數各賜紅綾餅餠所司以金合進上命中官馳以賜故徐演詩云莫欺老缺

殘牙齒曾喫紅綾餅餠來 天中記曰懿宗聞新第宴於曲江乃命折花一金合令中官馳至宴所宣口敕曰

便令戴花飲
酒無不為榮

燒尾

點額

西齋詒記曰士子初登榮
進及遷除朋僚慰賀必盛

置酒饌音樂以展歡宴謂之燒尾說者謂虎變為人唯
尾不化須為燒除乃得成人故云燒尾一云新羊所觸

不相親附火燒其尾則定貞觀中太宗嘗問朱子奢以
羊事對韻府羣玉曰大鯉不得登龍門者點額暴腮

矣
窺龍 戰蟻 宋王安石夜讀試卷詩蕉中得鹿初

窺龍

戰蟻

疑夢牖下窺龍始眩真 事文類聚

曰至和嘉祐間塲屋為文尚奇澀歐公力欲革其弊時
范景仁王禹玉梅公儀韓子華同事梅聖俞作參詳官

未引試前唱酬詩極多歐公有無譁戰士銜枚勇下筆
春蠶食葉聲聖俞有萬蟻戰酣春晝永五星明處夜堂

深為諸公所稱及放榜士論洶洶以為主司唯唱酬不
復詳考且言以五星自比而待我曹為蠶蟻自是禮闈

不復
作詩

主酒

探花

撫言曰進士榜出謝後便往期集
院狀元與同年相見請一人為錄

事其餘主宴主酒主樂主茶之類咸以其年辟之
中記曰進士杏園初會謂之探花宴以少俊二人為探
花使徧遊名園若他人先
折得名花則二人被罰
榜花 殿雷 唐大中以來

禮部放榜歲取二三人姓氏稀僻者謂之色目人亦曰
榜花 彙苑詳註曰宰執拆視則曰某人閤門則承之

以傳於壚傳亦謂之繞殿雷 施榻 過閣 嚴挺之曰
傳謂之壚傳亦謂之繞殿雷

為吏部侍郎施特榻試崔渙彝樽銘 文獻通考曰監
察御史潘緯言制科不過三事一繳進詞業二試六論

三對制策而進卷率皆夙著廷策豈無 決科 覓舉
素備惟六論一場謂之過閣人以為難

揚子曰儒以發策決科 舊唐書曰今之舉人驅馳府
寺之門出入王公之第上啓陳詩惟希效唾之澤摩頂

至足冀荷提攜之恩故 擺袖 拂衣 韓愈順宗實錄
俗號舉人皆稱覓舉 曰韋執誼巧慧

便辟媚幸於德宗其從祖兄夏卿為吏部侍郎執誼為翰林學士受財為人求科第夏卿不應乃探出懷中金以內夏卿袖夏卿驚曰吾與卿賴先人德致名位幸各已達豈可如此自毀壞擺袖引身而去執誼大慙恨記纂淵海曰楊大年為翰林學士適禮部試天下士一日會鄉里待試者或云學士必持文衡幸預有以教之大年乃作色拂衣而入則曰玉休哉大

女
童
軍
士

年果知貢舉凡用玉休哉者皆中選
文獻通考曰淳熙元年女童林幼玉求試中書後省挑試所誦經書四十三件並通詔特封孺人續文獻通考曰景泰元年翰林侍講學士劉鉉主考順天及揭曉第一人劉宣盧龍軍士也同事者欲更之鉉爭曰朝廷立賢無方
容
甚
麗
貌
不
揚

文獻通考曰漢孝武元

擢公孫弘對為第一召見容貌甚麗拜為博士續文獻通考曰建文帝二年策試禮部中式舉人賜胡靖王

艮等及第出身有差廷試策艮最優以貌不揚易靖
第一後艮死建文之難故曰以貌取人失之子羽

衣如雪

袍似銀

經濟類編曰郡國所選羣衆千萬孟冬之月集於京師麻衣如雪紛然滿

於九衢

記纂淵海曰元和十三載李源公榜三十三人皆取寒素時有詩曰元和天子丙申年三十三人盡

得仙袍似爛銀衣似錦相將白日上青天

皆名士

多宰相

孔帖曰孫逖取顏真卿李

華蕭頴士趙驛等皆海內有名士又曰賈餗凡三典貢舉得士七十五人多名卿宰相

明水賦

綠竹詩

洪興祖韓文公年譜曰唐科名記云貞元八年陸贄為主司試明水賦御溝新柳詩公名

在榜中見與陸員外書

文獻通考曰熙寧四年太子左贊善大夫吳安度試舍人院已入等有司以安度所

試綠竹詩背王易古說而直以為竹筵黜不取富弼言
史記敘載淇澳之竹正衛產也安度語有據遂賜進士

出身 居臺省 為公卿 冊府元龜曰陸贄德宗時為兵

文藝冠時贄輸心於肅與元翰推薦藝士數年之內居

臺省清近者十餘人 孔帖曰權德輿知貢舉所得士

相繼為公 隔進士 變秀才 記纂淵海曰陳彭年詣

卿宰相 之陳起呈狀曰科舉條貫公投之於地曰內翰做官幾

日待隔絕天下進士陳惶懼而退 又曰王安石改科

舉暮年覺其失曰本欲變學究為秀才不謂變秀才為

學究蓋舉子專誦王氏章句而不解義正如學究誦注

疏 慈恩寺 建福門 國史補曰唐進士自神龍以來

耳 他時有將相則朱書之 事文類聚曰新進士放榜後

翌日排光範門候過宰相雖云排光範門其實建福門

集於四方館者昔有詩曰華陽觀裏 古柳賦 瑞雪

鐘聲集建福門前鼓動時即其事也

詩孔帖曰呂渭遷禮部侍郎古柳復榮令貢士賦續
文獻通考曰程敏政休寧人程襄敏信長子年八歲

隨父入蜀撫臣以神童薦英宗試聖節及瑞雪詩
并經義各一篇援筆立就大喜詔讀書翰林院陸

贄輸心高郢拒請上詳居臺省注冊府元龜曰高
郢貞元末為禮部侍郎時應進士

舉者多務朋遊馳聲名罕理其業郢疾其風既領職拒
絕請托雖同列通熟無敢言者浮濫之風翕然一變

燒燭三條賦曰五色暮許燒燭三條韋永貽試日既

先畢作詩云白蓮千朵照廊明一片昇平雅頌聲才唱
第三條燭盡南宮風月盡難成而舊說亦言舉人試日

已晚主文權德輿於簾下戲云三條燭盡燒殘舉子之
心舉子遽答云八韻賦成驚破侍郎之膽撫言李程

貞元年試日五色賦先榜落矣初出試楊於陵見其賦
藁破曰德勳天鑒祥開日華謂程曰公今須作狀元翌

日雜文無名於陵深不平攜之以詣主文王命取
程所納面對不差一字因擢為狀元前榜不復放

黃

帕開封 朱衣點頭

上詳第三條蔡持正詩 天中記
曰歐陽脩知貢舉日每遇考試卷

生後常覺一朱衣人時復點頭然後其文入格不爾則
無復與選始疑侍吏及回顧之一無所見因語其事於

同列為之三數嘗有句
云唯願朱衣一點頭

春官桃李 南宮風月

劉禹錫詩

曰禮闈新榜動長安九陌人人走馬看一日聲名
徧天下滿城桃李屬春官 下見前燒燭三條注

英

雄入彀

神仙注榜

記纂淵海曰貞觀初放榜日太宗
私幸端門見進士於榜下綴行謂

侍臣曰天下英雄入吾彀中矣 韓持國詩曰鶴使曉
來華表上分明說得帝都春門開閭闔星河在榜注神

仙姓
氏新

皆選詞藝

多放才名

冊府元龜曰王起武宗
會昌中拜左僕射復知

貢舉起前後四典貢舉皆選當代詞藝之士又曰和
凝仕後唐為翰林學士知貢舉舊例放榜之日設棘於
門及閉院門以防下第不逞者凝令撤棘啓門寂無喧
者所放多才名之士

夢菜一苗

見雲五色

東齋遺事曰真宗臨軒策士夜夢殿下有菜
一苗與殿基相高及拆第一卷乃蔡齊上曰

得人矣事文類聚曰天聖五年仁宗試進士韓琦名
在第二時唱名第一甲方終太史奏五色雲見從官皆

賀

論疑子固

魁必方叔

彙苑詳注曰歐陽脩考其
禮部進士梅聖俞時與其

事得蘇軾刑賞論以示脩脩驚喜疑門下曾子固所為
乃置第二復以春秋對義居第一鶴林玉露云元祐

中東坡知貢舉李方叔名薦就試將鎖院東坡緘封一
簡令送方叔值方叔出其僕受簡置几上有頃章子厚

二子曰持曰援者來取簡竊視乃揚雄優於劉向論二
章攜之以去方叔歸求簡不得已而果出此題二章皆

模倣坡作方叔幾於閣筆坡意魁必方叔也第十名文
意與魁相似及拆號乃章持章援坡失色出院聞其故

大歎恨又東坡集有贈方叔落第詩
曰平生謾說古戰場過眼還迷日五色

郊祁得名

導迨入等

文獻通考曰仁宗天聖二年賜舉人及第出身有差宋郊與祁俱以詞賦得名時泰祁第

一太后不欲弟先兄乃擢郊第一祁第十又曰洪導
入中等洪迨入下等高宗覽其文歎曰此洪皓子耶父

在遠能自立
忠義報也

楚金請退 景莊及第

唐書曰張楚金與兄越石同舉

所司以兄弟不可兩收將罷越石楚金進曰以順則越
石長以才則楚金不如請俱退李勣曰國家貢舉本求

才行何妨雙與遂俱進士擢第又李景莊老於場屋
每被黜母輒捷景莊兄景讓宰相謂主司曰李景莊今

歲不可不取可憐彼兄每
歲受捷由是始得及第

玉筍知名

瓊林賜宴

孔帖

曰李宗閔復為中書舍人典貢舉所取多知名士
若唐冲薛彦袁都等世謂之玉荀 下詳後第二 王

師旦下浮豔 杜黃裳訪孤寒 旦天中記曰貞觀中王師

張昌齡王公瑾並有俊才聲振京邑而師旦考其文策
全下及奏等第太宗怪無昌齡等名因召師旦問之對
曰此輩誠有詞華然文章浮豔必不成令器臣若擢之
恐後生相效有變陛下風雅帝以為名言 又曰貞元
七年杜黃裳知舉聞尹樞時名籍甚乃微服訪之問場
中名士樞唯唯黃裳乃告曰某即今年主司也受命久
矣唯得一人其他不能盡知敢以爲請樞聳然謝云既
辱下問敢有所隱即言子弟有崔元畧孤寒有林藻令
其孤楚數人黃裳大喜 董方九舉不第 張綱五處作
魁 記纂淵海曰董方九舉不第號白蠟明經 坦齋筆
衡曰政和中張伯紀綱以三舍釋褐徽宗御崇政殿

賜之及第願問知舉吏部尚書張克公對曰綱自本州升貢次公試次內舍校定上舍合格次升補上等上舍皆第一人所以京師有五元之目上曰張綱五舉人處作魁必不是偶中當優獎之遂除太學博士

須補學生

進士不博刺史

冊府元龜云天寶十二載詔天下舉人不得充鄉試

皆須補國子學生郡縣學生然後聽舉天中記曰唐文宗嘗言進士之盛宰相對曰鄉場中自云鄉貢進士不博上州刺史上

笑曰亦無奈何

宣宗命處甲科

章聖特許殿試

山堂肆考曰唐宣宗好文賦詩有金步搖未能對溫庭筠以玉條脫應之宣宗命處以甲科為令狐綯所阻蓋綯嘗問事於庭筠庭筠對曰事出南華非僻書也冀相公變理之暇時宜覽古綯怒奏曰庭筠有才無行卒不登第庭筠有詩曰早知此恨人多積悔讀南華第二篇又曰宋王奇字漢謀贛州人為李文定迪客文定薨

章聖臨弔見屏間有詩曰鴈聲不到歌樓上秋色偏欺客路中問知奇作召見占對稱旨特許殿試既登科有詩曰不拜春官爲座主親逢天子作門生

貢舉二

原待問

待取

增遇家諱

南部新書云凡進士入試遇題目有家諱即托疾下

將息狀求出云牒某忽患心痛請出試院將息謹牒如的暴疾亦如是

名犯主文家諱

天中記云進士犯主文家諱雖音同字不同亦不敢入試如崔夢殷知舉以父名龜從則歸仁澤不敢試

制舉

文獻通考云唐制天子自詔曰制舉所以待非常之材試之日天子親臨觀之策高者特授以美官

其次與出身

貢院

玉海云禮部有貢院自唐開元始

策舉人含元殿

文獻

通考云開元八年上親策舉人於含元殿謂曰古有三道合減從一道近無甲科朕將存其上第

宋

五坦率

天中記云德宗夏中微行西明寺宋濟葛巾抄書上曰措大茶求一碗曰鼎水方煎可自潑之

上又問作何事業是何姓行濟曰姓宋第五應進士舉須臾聞呼官家濟惶恐起拜上曰宋五大坦率後禮部放榜上問有濟名否使回急賢詣子孔帖云沈傳師云無上曰宋五又坦率矣時給事中許孟

容禮部侍郎權德輿樂挽轂士號權許德輿稱之於孟容孟容曰我故人子盍不過我傳師往見謝曰聞之丈人脫中第則累公舉矣故不敢進孟容曰如子可使我急賢詣子不可使子因舊見我遂擢第得杜

顥足敵數百

又云杜顥舉進士禮部侍郎賈鍊語曰得杜顥足敵數百人

劉蕡下

第

冊府元龜云劉蕡寶歷二年進士耿介疾惡言及世務慨然有澄清之志文宗即位策試賢良蕡切論黃

門太橫將危宗社考官數服以為漢之晁錯無以過之而中官當塗不敢留在籍中物論喧然登科人李邵謂

人曰劉黃下第我輩厚顏矣

文宗自以題界有司

孔帖云高錯遷中書舍人開成

元年權知貢舉文宗自以題界有司錯以籍上帝語侍臣曰比年文章卑弱今所上差勝於前

以隸

人待士

孔帖云舒元興言古貢士未有輕於此時者宰相公卿由此出夫宰相公卿非賢不在選而有

可以隸人待之誠非所以下賢也羅棘遮截疑其非所以求忠直也詩賦微藝斷離經傳非所以觀人文化成也臣恐賢者自引去而不肖者為陛下用也

自將脂炬

文獻通考云舒元興舉進士見

有司鈎校苛切既試尚書雖冰炭脂炬食具皆人自將

其父在重任

冊府元龜云大中元

年禮部侍郎魏扶奏及第三人封彥卿崔瑒鄭延休等皆以文藝為眾所知其父皆在重任不敢選取其所試

詩賦並封進取進止令翰林
學士韋琮等考盡合程度

文星暗

記纂淵海云大
中中天官奏云

文星暗科場當有事後更三
科盡覆試復落考官皆罰俸

漏洩題目

事詞類奇唐
書大中九年

吏部試宏詞舉人漏洩題目為御史所劾考官刑
部郎中唐扶出為處州刺史其登科十人並落第

鄉

貢進士李道龍

天中記云宣宗酷愛進士及第每對朝
臣問及第苟有科名對者必大喜便問

所試詩賦題目并主司姓名或有人物稍好者偶
不中第歎惜移時常於內自題鄉貢進士李道龍

以

孟子為主

又云懿宗咸通四年進士皮日休上疏請去
莊列之書以孟子為主有能精通其義者其

科選視明

冬烘又云鄭薰侍郎主文誤以顏標為顏
魯公後取之時舉子賦詩曰主司頭

腦太冬烘錯認
顏標作魯公

槐黃

南部新書云槐
花黃舉子忙

字體濃淡相

間錦繡萬花谷云李紆侍郎故舉人命筆吏勒紙書榜未及填禮部貢院字吏得疾令史王昶亦善書詔令

終事值昶醉以擅筆染不能加墨字體濃淡相間反致其妍自後法之遂為故事

天雞有二

天中記云淮南張佖知舉進士試天雞弄和風賦佖但以文選中選句為題未嘗詳究也有進士白試官云爾雅雞天雞輪天雞有二未知孰是佖大驚不能對亟取爾雅檢釋蟲有輪天雞小蟲黑身赤頭一名莎雞一名榜雞釋鳥有輪天雞赤羽逸周書曰文輪若彩雞成王時蜀人獻之江南士人深於學問如此全

為司空先輩

北夢瑣言云王凝知貢舉司空圖才捷列第四人登科同年訝其名姓甚暗成事太

速有浮薄者號之為司徒空王知有此說因召一榜門生開筵宣言曰某竊忝文柄今年榜帖全為司空先輩

一人而已由是圖聲彩益振

焚香

沈氏筆談曰唐故事貢院設香案於階前與舉人對拜列坐設

位至於試學究則撤去席幕故歐陽脩詩云焚香禮進士撤幕待諸生

聞喜春關

冊府元龜

云後唐明宗天成二年勅新及第進士有聞喜宴春關宴逐年賜錢四十萬

改令畫試中

記云國史實正固傳舊制夜試以三燭為限晉長興二年改令畫試正固以短畫難成奏復夜試周廣順中竇儀奏復未嘗搖動冊府元龜云張昭仕晉為左丞少用畫試

請托甚峻昭未嘗搖動但務公平得鉅儒之體

不得稱門生

文獻通考云宋太宗建隆三年

詔及第人不得拜知舉官子弟弟姪及目為師門恩門并自稱門生

賜宴瓊林院

彙苑詳注

曰太平興國八年宋白等並賜及第賜宴瓊林院後遂為定制

豈容走吏竊科名

文獻

通考云太宗端拱二年親試舉人有中書守堂官陳貽慶舉周易學究及第上知之令追所受勅牒因謂侍臣

曰科級之設待士流也豈容走吏冒進竊取科名

登第近萬人

玉海云王元之曰先帝舍

短從長拔十得五在位將逾二紀登第亦近萬人

賦一篇詩六章

文獻通考云真宗景

德二年撫州晏殊年十四大名府姜蓋年十二長吏並以開召試殊詩賦各一篇蓋詩六章賜殊進士出身蓋

同學究出身

給衛士

東齋遺事曰蔡齊及第真宗臨軒詔金吾給衛士七人清道許出入則兩

對引喝

特取落韻

問奇類林云李文定公迪在場屋有盛名景德二年預省試主司皆

欲得之已而不在選主司意其失考取所試卷覆視之則以賦落韻而黜也遂奏乞特取之王魏公旦時為相

從其請既廷

臨軒策試進士

錦繡萬花谷云呂公著知貢舉密奏曰天子臨

軒策士而用詩賦非舉賢求治之意今來廷試乞出自宸衷惟以詔策咨訪治道自是上臨軒始以策試進士

大科文字

開元錄云范文正公以制科薦富鄭公弼富公辭以未習范公曰為君開一室皆大

科文字可往就館

忠孝狀元

記纂淵海云皇祐五年廷試進士前一日取首選卷焚香祝之

曰願得忠孝狀元洎唱名乃鄭獬也

一舉三十年推恩之法

聞見錄云至和間富

鄭公弼當國立一舉三十年推恩之法蓋公與段希元魏升平同場屋相善公作相不欲私之故為天下制至

之今行

堯舜是幾種事

西清詩話云世傳歐公掌禮闈舉子問堯舜是幾種事公曰疑

事不用也罷此乃南唐湯悅楊鸞問答見鄭文寶江表志

久虛之等

文獻通考曰故事制科分

五等然中選者皆第四等設科以來止吳正肅與子瞻入第三等故子瞻謝啓云誤占久虛之等

高

宗親書黏殿壁

事文類聚云陳敏修福州人紹興中黃公度榜第三人解試四海想中興之美

賦第五韻云蔥嶺金堤不日復廣輪之土泰山玉牒何時清封禪之塵高宗親書此聯黏之殿壁乃唱名問卿年幾何有幾子對曰臣年七十九成言無畏避文獻通考

三尚未娶乃出內人施氏嫁之云紹興二年親策進士張九成等時凌景夏為第二呂頤浩言景夏詞實勝九成請置第一上曰士人初進便須別其忠佞九成上自朕躬下至百執事言之無所畏避乃擢寘首選一古一今三等

取人又云博學弘詞科紹興二年立凡十二題制誥詔表露布檄歲銘紀贊頌序於內雜出六題分為三

場每場一古一今以三等取人富弼李后困學紀聞云宋制科至宰相者富弼一人孝宗時復

制科止得着山李后一人后字仲信為南北史世說傍犯名諱彙苑詳注云洪遵知禮部貢舉

一士賦擅場又對策剴切皆傍犯名諱公為取旨許降等奏名乾淳體文獻通考云孝宗時儒生

迭興詞章雅
正號乾淳體

三學諸生赴省試

續文獻通考云淳祐六年詔昨令三學各

舉經明行修氣節之士而諸生合詞控免兼義甚高其令在籍諸生並赴來年省試一次

御筆賜

程玘

又云理宗寶慶三年御筆賜程玘以下曰夫文辭浮靡者必非偉厚之器議論詭激者必無正平之

用去取之際其務審此

文昌星明

又云史稱仁宗皇慶初詔行科舉至延祐二年始開科取

士先是至元乙酉三月太史奏文昌星明文運將興時世祖幸上都丙子帝生於儒州是夜張起巖亦生及帝之即位始設科以取士而起巖遂為第一論者以為非偶然也

貢舉三

增詩唐劉禹錫送韋秀才赴舉詩曰君門起天中多士

如星攢煙霞覆雙闕
舞羅千官清漏滴銅壺
仙廚下雕盤熒煌仰金榜
錯落濡飛翰古來長策人所歎
遭時難一鳴從此始相望青雲端
魏扶知禮闈入貢院題詩曰
梧桐葉落滿庭陰鏤閉朱門試院深
曾是昔年辛苦地不將今日負初心
劉虛白試院獻裴令公詩曰
二十年前此夜中一般燈燭一般風
不知歲月能多少猶著麻衣待至公
孫山荅友詩曰解名盡處是孫山
餘人更在孫山外孟郊登第詩曰
昔日齷齪不足嗟

今朝曠蕩思無涯
春風得意馬蹄疾
一日看盡長安花

曹鄴杏園即席上同年詩曰
岐路不在天
十年行不至
一旦公道開
青雲在平地
枕上數聲鼓
衡門已如市
白日探得珠
不待驪龍睡
怱怱出九衢
僮僕顏色異
故衣未及換
尚有去年淚
晴陽照花影
落絮浮野翠
對酒時忽驚
猶疑夢中事
自憐孤飛鳥
得接鸞鳳翅
永懷共濟心
莫起胡越意
韋承矩題都堂壁曰
褒衣博帶滿塵埃
獨上都堂納卷回
蓬巷幾時聞吉語
棘籬何日免

重來三條燭盡鐘初動九轉丹成鼎未開殘月漸低人
擾擾不知誰是謫仙才 宋蔡持正崇政殿放榜詩曰
黃帕開封出奏篇銀袍二百玉階前威顏咫尺瞻中宸
名姓傳呼下九天宮筆旋題黃甲字禁門已逐杏花韉
孤臣拜賜交悲喜想望光芬十五年 元周伯琦廷試
奏進士榜詩曰太平天子策賢良詔問天人白玉堂校
藝盡尊周典禮策名寧數漢詞章風鳴松蓋宵聲殷雨
浥梨花雪色香承乏幸陪諸老後凌晨金榜出明光

歐陽玄詩并序曰泰定丁卯八月十二日崇天門傳臚
賜進士右榜第一人阿恰齊左榜第一人李黼皆肄業
國學曰新齋余西廳授業生也是日京尹備鼓樂旗幟
麾蓋甚都導二狀元入學謝師拜余明倫堂榜眼劉思
誠探花郎徐容嘗因同年黃晉卿彭幼元從予遊亦拜
其側其餘進士以門生禮來拜謝雜還不記姓名園橋
門而觀者萬計偶成絕句以紀其事禁院層層桃李開
天街繡轂轉晴雷銀袍飛蓋人爭看兩兩龍頭入學來

淡墨題名二十年一官獨自擁寒壇居然國子先生館

三五魁躔拜座前馬祖常試院雜題曰小雨霏微不

作泥棘闌魚鑰待晨雞銀袍影近花燈立綵戶光連粉

署題霏霰已霑文運慶綢繆猶覺化鈞齊端門三月黃

金榜應有商霖應上奎又曰蓮炬銀臺隋蠟泥璫瑜

重席織文難計偕萬里人交趾骨買千金馬月題省樹

春回珠蕊亞御溝水泮纈波齊臚傳名上多龍虎昨夕

官占已報奎又曰春闈新雨透花泥學士聯詩擬闕

雞腰裏龍媒來大宛狡狴獅子出雕題宮花壓帽牌金

小官錦裁袍綬綵齊奏牘三千方朔健天章爛漫象西

奎 又貢院詩曰杏園三月換銀袍燕子西風背伯勞

賦罷長楊傳唱急天門金榜日華高 又曰紅綾餅餤

出宮闈賜宴恩榮玉殿西白髮詞臣曾射策榜名欣見

武都泥 貢師泰殿試後詩曰春風馳道入宮牆青瑣

深沈引夕郎草染綠波生太液花扶紅日上披香聲名

已重千金璧恩寵方隆七寶牀治世斯文今極盛九天

星斗自成章 薩都拉及第謝恩詩曰禁柳青青白玉

橋無端春色上宮袍卿雲五彩中天見聖澤千年此日

遭虎榜姓名書彩紙羽林冠蓋豎旌旄朝回龍尾頻回

首玉漏花深紫殿高 又賜恩榮宴曰內侍傳宣下玉

京四方多士被恩榮宮花壓帽金牌重舞妓當筵翠袖

輕銀甕春分官寺酒玉杯香賜御廚羹小臣涓滴皆君

賜惟有丹心荅聖明 明高啓送貢士會試詩曰國家

文治今百年多士孰賚皆知天南宮坐試二三策能使

海內無遺賢院門晨開官燭爛白袍鵠立人五千上談
禮樂祖姬孔下議制度輕讐元臨軒曾看宰相賀雲間
盡見當臚傳看花或騎太僕馬錫宴每給司農錢登朝
出牧知幾輩冠佩劒舄紛相聯

增序宋范成大姑蘇同年會詩序曰進士科始於隋盛
於唐本朝因之偕升者謂之同年衣冠之好由來尚矣
唐人尤喜期集燕設之名亡慮十數而曲江大會長安
坊市為半空天子至御樓以觀當此時通榜之士意氣

相予甚厚否則有紫陌青雲之譏國朝畧去浮侈但存
聞喜一燕而同年之制則加詳焉既朝謝揆日集貢院
奉賜第錄黃於香案則拜禮畢更以齒班立四十以上
東序西鄉未四十西序東鄉推年最長若最少者各一
人升堂長者中立南鄉少者北鄉春官吏贊拜少者拜
又贊荅拜長者洎兩序皆再拜謂之拜黃甲敘同年所
以明章風期篤敘事契委曲之意過唐遠矣士大夫寧
得輕負此意忽然雲散異日相視如塗之人乎

增論明丘濬大學衍義補曰本朝雖大封拜百官亦未
嘗具服拜賀惟於策士傳臚之後羣臣致辭慶賀曰天
開文運賢俊登庸由是觀之則祖宗所恃以求賢輔治
之具誠莫先於進士一科是以百年以來凡明治體建
功業者皆自此塗以出唐史言方其取以辭章類若浮
文而少實及其臨事施設奮其事業隱然為國名臣者
不可勝數宋人亦言豪傑之士由之而進夫唐宋取士
以詩賦多文而少實尚足以得一時之豪傑以為名臣

況本朝取士之制本六經語孟之文用濂洛關閩之說
即漢人所謂經術宋人所謂道學者也為士者誠專心
於此而有所得焉上之人精擇而謹取之必名實相符
文質相稱然後得預斯選焉其所得之人才當不止於
唐宋而已也